

22 janvyè 2021

Chè Fanmi,

Mwen espere nou vèl ane a bon pou ou epi moun ki pwòch ou yo byen epi timoun ou yo reprann woutin aprantisaj yo. Gen anpil bon bagay k ap pase nan lekòl leta nou yo mwa sa a!

Dabò, nou angaje pou kontinye amelyore ansèyman ak aprantisaj pandan ane lekòl san parèy sa a. Opinyon w enpòtan nan efò sa a. Semèn sa a, nou demare Sondaj sou eksperyans lekòl nou an pou nou ka gen enfòmasyon sou eksperyans elèv ak fanmi nou yo nan aprantisaj adistans ak anpèsòn ane lekòl sa a. Objektif nou se itilize enfòmasyon sa a pou amelyore aprantisaj pou rès ane a. Fanmi timoun ki nan klas 3-K rive 12 yèm ane, ak elèv klas 6yèm-12yèm ane ka ale kounye a nan schools.nyc.gov/experiencesurvey pou di nou sa ou panse!

Dezyèmman, ou ka okouran n ap fè kèk gwo chanjman nan pwosesis admisyon lekòl primè, presegondè ak segondè pou sèvi tout elèv nou yo pi byen. Chanjman sa yo pral ede nou kontinye amelyore pou nou gen yon pi bon sistèm lekòl ki pi ekitab, ki ede chak elèv reyisi.

Nan mizajou pou fanmi ki pi ba a, ou pral jwenn plis enfòmasyon sou nouvo règleman admisyon sa yo, ansanm avèk tou enfòmasyon sou sondaj sou eksperyans lekòl la.

Nan lòt nou vèl, mwen ta renmen fè w konnen nou distribye 450000 aparèy gratis pou elèv depi prentan ki sot pase a pou ede yo avèk aprantisaj adistans yo. Nou gen 50000 aparèy anplis ki sou wout. Ou bezwen yon aparèy? Mande lekòl ou a. Ou pa bezwen ranpli fòm sou entènèt ankò; lekòl ou a ap ede w avèk pwosesis la pou resevwa youn.

Vaksen gratis COVID-19 la ap fè aktyalite epi ou ka ap mande kilè ak ki kote ou ka pran pa w la. Moun ki abite Nouyòk ki gen laj 65 ane oswa plis ak kèk travayè ensdispansab ki reponn anpremye, tankou estaf lekòl ak gadri, yo elijib pou pran vaksen an kounye a. Moun Nouyòk ki elijib yo ka rezève randevou yo si yo rele nan (877) VAX-4NYC oswa si yo ale nan nyc.gov/VaccineFinder. Ou ka jwenn tou enfòmasyon ki ajou sou kiyès ki elijib nenpòt lè nan nyc.gov/vaccinecommandcenter. Yo poko ap bay vaksen COVID-19 pou timoun ki poko gen laj 16 ane; sepandan, nou gen pou fè w konnen si ak ki lè timoun ki poko gen laj 16 ane elijib pou resevwa li.

Mèsi ankò dèske ou kolabore avèk nou pou asire tout elèv nou yo resevwa pi bon edikasyon posib la nan pi bon vil ki nan mond lan.

Avèk senserite,



Richard A. Carranza
Chanselye
Depatman Edikasyon Vil Nouyòk

Mizajou pou fanmi, 22 janvye 2021

Sondaj ekperyans lekòl otòn 2020

Nou ta renmen konnen ekperyans ou fè avèk aprantisaj adistans ak anpèsòn pandan ane lekòl sa a. Depi kounye a jiska 5 fevriye, tanpri pataje opinyon w nan Sondaj la lè w ale nan schools.nyc.gov/experiencesurvey.

Sondaj la kolekte enfòmasyon nan men fanmi, elèv, ak pwofesè sou aprantisaj adistans, komunikasyon, itilizasyon teknoloji, ak tou sou sante, sekirite, ak enstriksyon pou elèv ak pwofesè ki te ale lekòl oswa travay anpèsòn nan nenpòt pwen pou ane lekòl sa a. Opinyon ou ap ede nou konprann bezwen elèv yo ak amelyore aprantisaj adistans ak anpèsòn pou rèz ane lekòl la.

Sondaj la ouvri pou fanmi ak pwofesè elèv ki nan klas 3-K-12yèm ane, ak pou elèv ki nan klas 6-12yèm ane. Sondaj la disponib nan lang Angle, Arab, Bengali, Chinwa, Franse, Kreyòl Ayisyen, Koreyen, Ris, Panyòl ak Oudou. Tout opinyon ou pataje yo anonim ak konfidansyèl.

Nenpòt moun ki pa ka ranpli sondaj la sou entènèt ka rele 311 pou jwenn sipò pou pran sondaj la pa telefòn. Delè pou fini sondaj la se 5 fevriye, epi nou ta renmen tande opinyon w!

Admisyon nan lekòl segondè ak lekòl presegondè

Aplikasyon pou lekòl presegondè ouvri 14 janvye ak aplikasyon pou lekòl segondè ouvri 20 janvye. Ane sa a nou te fè kèk chanjman pou sipòte pakou aprantisaj elèv nou yo pi byen ak asire yon pwosesis ki pi jis pou tout fanmi lekòl leta nou yo.

Lekòl presegondè

Elèv ki nan dènye ane lekòl primè yo kapab aplike kounye a nan lekòl presegondè! Dat limit pou aplike a se 9 fevriye. Jan DOE te fè konnen sa nan mwa desanm lan, lekòl presegondè ki te konn evalye ("screened") aplikan pou admisyon yo pap itilize dosye akademik, odisyon, ni lòt evalyasyon pou evalye oswa aksepte elèv ane sa a. Pòz sa a sou evalyasyon yo pral antre an efè pou tout 70,000 elèv senkyèm ane k ap antre nan lekòl presegondè otòn sa a.

- Kondisyon elijiblite yo (ki elèv ki ka aplike nan yon lekòl espesifik) ak priorite pou admisyon (lòd yo aksepte gwoup elèv nan lekòl sa a) pa chanje. Elèv ap kontinye gen priorite pou yo ale nan lekòl presegondè ki tou pre kote yo rete a oswa kote yo nan lekòl primè kounye a. Si nenpòt pwogram lekòl presegondè gen plis aplikan pase plas ki disponib, yo pral fè òf nan pwogram sa a pa tiraj osò ak avèk nenpòt priorite pou admisyon lekòl la genyen (pa egzanp, pou elèv ki gen andikap oswa elèv k ap aprann nan plizyè lang). Sa a se fason pifò pwogram lekòl presegondè nan Vil Nouyòk deja aksepte elèv.
- Nou pral angaje kominote lekòl yo pou bay opinyon yo sou itilizasyon evalyasyon (screen) pou ane kap vini yo.

Nou deside pran yon poz sou evalyasyon lekòl presegondè ane sa a paske mezi lekòl screen yo te itilize avan yo pou pran desizyon pou admisyon pa disponib ankò akòz pandemi an. Anplis, kriz sante COVID-19 la gen yon enpak san pwopòsyon sou kominote moun ki pa blan, fanmi imigran, ak lòt kominote tradisyonèlman defavorize. Fè yon poz sou evalyasyon pou admisyon ane sa a pral ede kreye anviwònman aprantisaj pi enklizif ak plis opòtinite pou tout elèv Vil nou an.

Pou jwenn plis enfòmasyon sou admisyon nan lekòl presegondè, tanpri ale nan schools.nyc.gov/middle.

Lekòl segondè

Kounye a aplikasyon nan Lekòl segondè kòmanse, w ap kapab aplike sou entènèt nan MySchools.nyc oswa atravè konseye lekòl ou a. Dat limit pou aplike a se 23 fevriye.

Epi, si w poko fè sa deja, ou ka toujou anrejistre pou admisyon nan Lekòl segondè espesyalize yo—konnen kijan nan schools.nyc.gov/SHS.

- Pou aplike nan nenpòt nan uit lekòl ki mande tès yo, enskri pi vit posib pou pran tès admisyon nan lekòl segondè espesyalize (Specialized High Schools Admissions Test, SHSAT) a. Tout elèv uityèm ane kounye a ki enskri nan dat limit 15 janvyè a pral pran tès la 27 janvyè. Ou ka toujou enskri jiska 28 janvyè pou pran tès la nan yon dat tès pita. Yo pap aksepte enskripsyon apre 28 janvyè.
- Pou aplike nan pwogram atistik LaGuardia High School, enskri avan 23 fevriye pou fè odisyon pou LaGuardia High School. Tanpri sonje tout odisyon lekòl segondè ane sa a — tankou pou LaGuardia High School — ap fèt yon fason vityèl. Ou ka jwenn kondisyon mizajou pou pwogram odisyon nan schools.nyc.gov/HSAuditions.

Kòm yon pati nan yon pi gwo efò pou fè pwosesis admisyon lekòl segondè a pi senp ak pi ekitab pou fanmi, n ap elimine priorite jewografik (ki baze sou lokal) nan admisyon pou lekòl segondè ofiamezi nan de pwochen ane yo. Sa vle di, apre ane pwochen, adrès kay yon elèv pa sifi pou detèmine chans li pou li antre nan yon sèten lekòl.

Patisipe nan fwa/ekspozisyon vityèl lekòl segondè art yo

Ou enterese nan pwogram art? Patisipe avèk nou nan nenpòt nan aktivite sa yo pou jwenn enfòmasyon sou kondisyon odisyon pou chak disiplin, pwosesis odisyon an pou ane sa a, ak kòman pou voye odisyon ou sou entènèt. Sa a se yon chans tou pou rankontre reprezantan ki nan lekòl odisyon NYC yo, ladan LaGuardia High School. Tanpri sonje lekòl ki nan diferan borough pral patisipe ak prezante nan diferan dat. Nan fen reyinyon an, estaf lekòl ak anplwaye DOE pral reponn kesyon ou genyen.

Pou jwenn plis enfòmasyon sou admisyon nan lekòl presegondè jeneralman, ale nan schools.nyc.gov/high.

Chanjman nan pwogram G&T yo

Semèn pase a, nou te anonse ane sa a se pral dènye ane Vil Nouyòk pral bay tip egzamen G&T aktyèl la pou timoun ki gen laj katran. Nou kwè gen yon pi bon fason pou sèvi jèn nou yo k ap aprann.

- Nou pral pase ane kap vini an angaje kominote sou ki kalite pwogram yo ta renmen wè ki pi enklizif ak anrichisan, ak ki sipòte tout bon bezwen divès kalite elèv ki gen talan yo nan diferan laj.
- Nou pral tou angaje kominote pou reflechi sou kòman pou entegre opòtinite aprantisaj anrichisan pou plis elèv, konsa chak elèv kapab jwenn aksè nan aprantisaj solid ki adapte avèk bezwen li ak ki ankouraje kreyativite, pasyon, ak fòs li.

Elèv ki kounye nan pwogram G&T, ladan sa k ap antre nan pwogram sa yo ann otòn sa a, pral kapab fini pwogram lekòl primè yo. Y ap afiche enfòmasyon sou tès ane sa a nan semèn kap vini yo sou sitwèb DOE epi n ap pataje yo avèk kominote lekòl yo.